

Headline	Anak,Bapa Masing-Masing Terima Ijazah,Diploma		
Date	23. Oct 2008	Language	MALAY
Media Title	Utusan Malaysia (Central)	Page No	28
Section	Dlm Negeri	Article Size	153 cm2
Circulation	238082	Frequency	Daily
Readership	833287	Color	Full Color
		AdValue	4696.64



Anak, bapa masing-masing terima ijazah, diploma

KUALA LUMPUR 22 Okt. - Dengan keazaman dan tekad untuk menjadi contoh kepada anak-anak, seorang bapa kepada 11 orang anak berjaya menerima Ijazah Sarjana dalam bidang Linguistik pada Majlis Konvokesyen Universiti Putra Malaysia (UPM) Ke-32 di Serdang.

Kejayaan Ahmad Razei Abu Bakar, 49, itu lebih bermakna lagi kerana pada majlis itu, anaknya, Nur Nadiah Ahmad Razei, 21, turut menerima Diploma Pengurusan Perladaan Makanan.

Ahmad yang merupakan bekas kerani di UPM pada tahun 1979 menjadikan kejayaan anak-anak muda yang memperoleh ijazah dalam bidang masing-masing sebagai pendorong untuk melanjutkan pelajaran.

Menurutnya, beliau memilih untuk melanjutkan pengajian ke peringkat ijazah selepas teruja melihat ramai anak-anak muda yang

belajar di UPM berjaya dalam pelajaran.

"Mereka semua telah berjaya dan sekarang saya juga tidak mahu ketinggalan untuk bersama-sama menggenggam segulung ijazah yang telah lama saya idamkan."

"Saya sedar tanpa pelajaran dan ilmu pengetahuan, kita tidak akan mampu untuk bersaing," katanya ketika ditemui selepas majlis konvokesyen itu di sini hari ini.

Beliau yang juga seorang pegawai keselamatan berkata, kejayaan hari ini adalah berkat doa dan sokongan moral yang diberikan oleh isteri dan keluarga.

"Merekalah yang selama ini menjadi pembakar semangat untuk saya melanjutkan pelajaran ke peringkat ini."

"Saya mempunyai 11 orang anak dan saya mahu mereka berjaya. Sebagai ayah kita harus menjadi contoh kepada anak-anak," jelasnya.

Sementara itu, Nur Nadiah berkata, beliau bangga dengan kejayaan ayahnya hari ini dan rasa bersyukur kerana mereka berdua berjaya menamatkan pelajaran.

Berkat kesabaran dan muafakat, katanya, mereka akhirnya berjaya meneruskan pengajian dan memperoleh apa yang diidamkan.

"Saya juga akan buktikan kepada ayah saya bahawa saya juga nanti akan berjaya memegang segulung ijazah sarjana," ujarnya.